

Fundacion Concierto Dominical Donny Lacle

Esnan presente a keda encanta cu 2 tremendo agrupacion y un sorpresa inolvidabel



DIA 25 di october 2015 a tuma lugar den The French Steak House Restaurant di Manchebo Beach Hotel, e famoso Concierto Dominical Donny Lacle.

Lamentabelmente nos mester a habri nos concierto cu un minuut di silencio pa conmemora nos gran amigo Richard Harms (d.f.m.).

Richard, te algun luna pasa, no solamente tabata un fiel bishitante di nos concierto, pero tambe miembro di Fundacion Donny Lacle, y diferente biaha a fungi como MC.

Sra. Bep Bastiaanse despues a recita un poesia hopi emocionante dedica na Richard y Livio Hermans a toca riba piano un parti di un Sonate Andante di Mozart cu Richard tabata gusta scucha.

Coro La Escala, consistiendo di 17 persona entre cantante y musico, bou direccion di Héctor Pérez a interpreta cancionnan popular di Aruba y di e folklore Latino Americano.

Meta di e coro, hiba canto y alegria na diferente lugar manera hospital, centro di barrio, aki sigur a logra su meta, yenando The French Steak House cu un ambiente dushi y alegre.

Me voy pal pueblo, Ayera y un potpourri Mama tenemi na cas, ta algun di e canticanan di cua esnan presente a disfruta.

E programa a sigui cu presentacion di FUENTE, un agrupacion, consistiendo di tres hoben: Susjaira Kerpens, cantante, Chris Kross, guitarra y Siegfried Hart, percusion.

Fuente a haci hopi furor durante e ultimo simannan cu e CD cu nan a saca, cu algun cantica cu ta composicion di Susjaira y Siegfried.

Nan a presenta algun di nan canticanan, entre otro Aw'i Coco y Trafico. Y tambe Grapefield, cu a laga e bishitantenan kere cu ta Isaline Calister tabata canta na lugar di Susjaira. Pa Chris y Siegfried, por lo pronto tabata nan ultimo presentacion den nos concierto, pasobra na januari otro aña nan lo biaha pa Merca pa sigui cu na studio na Conservatorio di North Carolina Central University. For di awor caba nos ta desea nan hopi exito cu nan estudio.

A termina e programa cu Grupo Sorpresa Musical organisa dor di Rolin Croes. Un poco luna pasa durante un concierto e MC a puntra Rolin si e por a canta "Bula waya", pero Rolin a contesta cu n'e momento ey e no por.

Si el a ofrece pa forma un grupo p'asina durante un proximo concierto duna un aporte n'e meta di Fundacion Donny Lacle pa Hoben

Musico Talentoso.

Y diadomingo e dia a yega. Grupo Sorpresa Musical, consistiendo di e pianista Albert Croes, dos violinista Nicola Roger Grigoriu y Angela Flores, e bahista Ivan Romano, dos percusionista Carlos Bislip y su alumno Moises van de L'Isle, cuarto Doodle Sophia, tres cantante Arlenne Croes, Rachel Kraaijvanger y Shurby Maria, maraca Rolin Croes a brinda musica varia; crioyo, pero tambe internacional, musica canta y tambe instrumental.

Publico a tende dushi musica na piano a tende e fionan yora y a bira loco di entusiasmo. Loke e grupo aki a presenta tabata un sorpresa unico di un nivel hopi halto.

Nan a canta y e publico a balia te dos or. Y ainda tabata pidi pa mas. Pues un gesto bunita di Rolin y tambe di e musiconan cu a aporta. Fuera di e tremendo presentacionnan tur hende por a gosa di e hospitalidad y bon servicio di e personal di The French Steak House, loke a duna e evento aki un ambiente unico.

Comision organizado ta gradici tur esnan cu a bin presencia e concierto aki y ta pidi un y tur pa keda pendiente di e concierto fin di november cu lo ta den ambiente di Pasco.